



**Nunatta pissarititai atorlugit sanaartornermut atortussiornermi tunisassiornissamik aallarnisaaniartut qanoq iliorluta tapersersorsinnaanissaat pillugu apeqquteqaat aallaavigalugu Inatsisartut oqallinnissaannik siunnersuut.**

(Inatsisartunut ilaasortaq Ineqi Kielsen, Siumut)

Demokraatini nuannaarutigaarput qulequtaq una ullumikkut qaqinneqarmat.

Niuernermi isertitat aningaasartuutillu oqimaaqatigiisinnerat qissimikkutsigu takussavarput nioqqutissat eqqussagut avammut tunisassiatsinnut naleqqiullugit amerlanerungaartut. Ukiullu marlussunnguit eqqaassanngikkaanni Namminernerullutik Oqartussaanerup Namminersorlunilu Oqartussaanerup ingerlanerani ukiut tamaasa taamaattuaannarnikuuvoq. Tamanna tunngavigalugu avataaniik nioqqutissanik eqqussuineranut qasukkaallatsitsisinnaasut tikilluaqqusariaqarpagut.

Uani apeqquteqaat aallaavigalugu oqallinnermi siunnersuuteqartup ilaatigut eqqaavaa najukkami tunisassiarineqartut Sikublockit. Qularutigineqassanngilluinnarpoq nuannissagaluaqimmat Sikublock imaluunniit sanaartornermi atugassiat allat najukkami tunisassiarineqartut atorsinnaagaluarutsigit - sulilu pitsaanerussagaluarpoq atortussat tamakku avammut nioqqutigisnnaagaluarutsigit. Kisianni ajoraluartumik najukkami tunisassiat atorsinnaannginnerat pissuteqarpoq, tassungalu akissutissatuaangallarpoq allani tunisassiarineqartartut pitsaaneruneri akikinnerunerilu.

Pisortat sanaartortitsissappata imaluunniit namminersortut, taava amerlasuutigut sanaartorniartup kissaatigisarpaa sapinngisamik pitsaanerpaamik akikinnerpaamillu sanaartornissani. Taamaaliornikkut aningaasat pissarsiaqarfiunerpaasarput, taamatullu kissaateqartarpoq kinaluunniit sanaartortitsiniartoq.

Taamaattumik Demokraatini isumaqarpugut najukkami sanaatornermi atugassat tunisassiarineqartut atorneqartannginnerannut ajortumik isumaqarneq pissutaasartooq - apeqqutaaginnarpoq suut atussallugit imminut akilersinnaanerunersoq.

Taamatulli oqareerluta iluarisimaarparput, Namminersorlutik Oqartussat soorlu Greenland Business aqqutigalugu aallarnisaasartunut najukkami sanaartornermi atugassiat qanoq iliorluni



atorluarneqarnerunissaanut isumassarsisimasunut tapiisarmat. Kisianni allatut ajornartumik oqartariaqarpugut ajussaquisoq najukkami atortussiarineqartut sanaartornermut sanarfinermullu akitsorsaataasassappata. Akiligassarmi naggataatigut atuisartumit akilerneqartussaavoq tamannalu ugornassaqaq.

Taamatut oqaaseqarlutat Inatsisartut oqaaseqaateqarnissaannut siunnersuut ilalerparput qilanaarlutalu oqallittoqarnissaanut.